



ILIDŽA

INFORMATIVNI BILTEN OPĆINE ILIDŽA



Tragozi jeseni



Sa 20. redovne sjednice Općinskog vijeća Ilidža

Donesena Odluka o usvajanju i provođenju Regulacionog plana „Centar Ilidža“

Na osnovu Zakona o prostornom uređenju Kantona Sarajevo i Statuta Općine Ilidža, Općinsko vijeće je donijelo Odluku o usvajanju i Odluku o provođenju Regulacionog plana „Centar Ilidža“. Izradu Regulacionog plana inicirala je Općina Ilidža jer je provedbeno-planska dokumentacija rađena prije 5 godina, ali je njena realizacija bila otežana, što je postalo ograničavajući faktor razvoja ovog područja. Obzirom na stanje na terenu i obavezu urbaniziranja prostora predložena je izrada novog plana pod nazivom „Centar Ilidža“. Koncept plana zasniva se na urbanizaciji i stvaranju preduvjeta za razvoj respektabilnog rejonskog centra Ilidže sa svim pratećim sadržajima. Planom je predviđena izgradnja stambeno-poslovnih objekata sa sadržajima društvenog standarda, poboljšanje kvaliteta življenja stanovnika, opremanje naselja nedostajućim sadržajima društvene infrastrukture, opremanje

područja mrežom saobraćajnica i komunalne infrastrukture. Sastavni dio Plana je i Odluka o provođenju Regulacionog plana kojom se utvrđuju uslovi korištenja, izgradnje, uređenja, zaštite prostora i način provođenja, a naročito granice prostorne cjeline, urbanističko-tehnički uslovi za izgradnju građevina, uslovi za uređenje građevinskog zemljišta, uređenje zelenih i slobodnih površina, odnos prema vodotoku te uslovi uređenja površina za saobraćaj i saobraćaj u mirovanju i odnos prema postojećim objektima. Regulacionim planom predviđeno je izmještanje Prve osnovne škole u prostor van obuhvata ovog plana, na lokalitet koji se nalazi između objekta kina "Igman" i stare zgrade Općine, a važno je napomenuti i da se već postojeći objekat Prve osnovne škole može dislocirati tek nakon izgradnje i mogućnosti upotrebe novog objekta škole.

Utvrđen Nacrt Odluke o obavljanju poslovnih djelatnosti na području općine Ilidža

Vijeće je utvrdilo Nacrt Odluke o obavljanju poslovnih djelatnosti na području općine Ilidža i uputilo ga na javnu raspravu u trajanju od 30 dana u periodu od 15. oktobra do 15. novembra 2014. godine. Zadužena je Služba za privredu i turizam da organizuje i provede javnu raspravu o Nacrtu i da ga zbog davanja primjedbi, mišljenja i sugestija dostavi službama za upravu, stručnim i posebnim službama Općine, Forumu privrednika općine Ilidža, osnovnim i srednjim školama na području općine i savjetima mjesnih zajednica. Za vrijeme trajanja javne rasprave Nacrt Odluke bit će objavljen na WEB stranici Općine i svi zainteresovani mogu u pisanoj formi dostaviti svoje primjedbe, prijedloge, mišljenja i sugestije Službi za privredu i turizam putem Centra za pružanje usluga građanima Općine Ilidža ili putem e-mail adrese privreda.turizam@opcinailidza.ba. Služba za privredu



i turizam obavezna je da podnese izvještaj o rezultatima javne rasprave i dostavi Općinskom vijeću na usvajanje Prijedloga Odluke o obavljanju poslovnih djelatnosti na području općine Ilidža.

Informacija o provođenju Zakona o dopunskim pravima boraca-branitelja BiH

Informacija o provođenju Zakona o dopunskim pravima boraca-branitelja BiH bila je jedna od tačaka dnevnog reda 20. redovne sjednice održane 25. septembra 2014. godine. Informacija daje prikaz stanja u oblasti Službe za boračka pitanja u kojoj korisnici boračkih kategorija ostvaruju prava propisana federalnim i kantonalnim zakonima na brz i efikasan način. Samo jedno od prava, koje stoji u Informaciji, pravo na zdravstvenu zaštitu u periodu zaključenom sa 31. augustom 2014. godine imalo je 696 nosioca ovog prava, što zajedno sa brojem korisnika članova njihovih porodica iznosi 1.740 korisnika. Pored zdravstvene zaštite zakon tretira, između ostalog i banjsko i klimatsko liječenje, naknadu putnih troškova i troškova za liječenje u inostranstvu, prioritet u zapošljavanju kao i naknadu troškova dženaze-sahrane. Služba za boračka pitanja vodi evidenciju o broju korisnika prava, prati promjene i poduzima sve mjere i aktivnosti kako bi se ispoštovali svi Zakonom propisani rokovi.



Alma Vatrić izašla iz SBiH, a Amir Džafo iz NDS-a

Vijećnica Alma Vatrić je obavijestila Vijeće da je istupila iz Stranke za BiH i da će se ubuduće izjašnjavati kao samostalna vijećnica. Također, vijećnik Amir Džafo obavijestio je Vijeće da je istupio iz Napredne demokratske stranke i da će ubuduće biti samostalni vijećnik.

Razriješeni članovi komisija

Pred vijećnicima je bio i prijedlog rješenja o razriješenju člana Komisije za prostorno planiranje, mjesne zajednice, komunalne poslove i ekologiju, Senahida Godinjaka, na prijedlog Općinske organizacije Stranke za BiH, a na njegovo mjesto imenovan je Mirsad Mašić. Također na prijedlog OO Stranke za BiH razriješeni su članovi Komisije za planiranje općinskog razvoja Anesa Hošić i Belma Mizdrak, a imenovani Munevera Trnka i Haris Ibričić.





Usvojen Izvještaj o radu i finansijskom poslovanju JU KSC Ilidža

Na 20. redovnoj sjednici Općinskog vijeća usvojeni su i Izvještaj o radu i Izvještaj o finansijskom poslovanju Javne ustanove Kulturno-sportski i rekreacioni centar Ilidža za period od 01. januara do 30. juna 2014. godine. Na osnovu ovih izvještaja JU KSRiC Ilidža je u dosadašnjem radu ostvarila pozitivno poslovanje ličnih dohodaka sa uplaćenim doprinosima kao i izmirenim svim poreskim obavezama i obavezama prema dobavljačima. U cilju podizanja nivoa usluge uložena su sredstva za sanaciju objekta i nabavku opreme što je podrazumijevalo generalno čišćenje, zamjenu pumpe za potisak vode u sistemu grijanja, atest elektroenergetskih instalacija, zamjenu oštećenih pločica na ulazu u salu za borilačke sportove, nabavku neophodnih sredstava za održavanje čistoće i rasvjete i vršenje sitnih opravki koje su bile neophodne za funkcionisanje univerzalne dvorane, Ljetne pozornice i otvorenog terena. Ukupni ostvareni prihodi ove javne ustanove za navedeni period iznosili su 194.655,08 KM, rashodi 192.325,49, dok je ukupna dobit za prvo polugodište 2014. godine iznosila 2.329,59 KM.

Dato ovlaštenje Općinskom načelniku za provođenje postupka dodjele novčanih sredstva

Općinsko vijeće Ilidža je na 20. redovnoj sjednici donijelo i Odluku o davanju ovlaštenja Općinskom načelniku za provođenje postupka dodjele novčanih sredstva Federalnog Fonda za pomoć nastradalim područjima od prirodne nesreće na teritoriji FBiH. Ovom odlukom Općinsko vijeće ovlastilo je Općinskog načelnika da provede postupak dodjele novčanih sredstava u iznosu od 51. 670,17 KM od strane Federalnog fonda za pomoć nastradalim područjima od prirodne nesreće na teritoriji FBiH, koje su doznačene Općini Ilidža.

Sportskim udruženjima dodijeljene prostorije na korištenje bez naknade

Općinsko vijeće donijelo je Odluku o korištenju sportskim udruženjima prostorija u Domu kulture Stupsko brdo. Prostorije su na korištenje bez naknade dobili sportska udruženja sa područja općine Ilidža, a to su: NK „STUP“, Udruženje „STEP JUNIOR“, Stonoteniski klub „ILIDŽA“ i Karate klub „NEDWA“. Prostorije su ukupne površine 245 metara kvadratnih i ova četiri udruženja će ih koristiti za provođenje svojih redovnih sportskih aktivnosti. Općinski načelnik će sa udruženjima zaključiti ugovor kojim će se regulisati međusobna prava i obaveze.

Općina Centar donirala 30.000 KM Ilidži za sanaciju šteta uzrokovanih majskim poplavama



Delegacija Općine Centar predvođena predsjedavajućim Općinskog vijeća Nedžadom Ajnadžićem posjetila je 19. septembra 2014. godine Općinu Ilidža. Tom prilikom sa načelnikom Općine Ilidža prof. dr. Senaidom Memićem potpisan je protokol kojim je iz budžeta Općine Centar izdvojeno 30.000 KM za pomoć u sanaciji štete koju su uzrokovale majske poplave na području Ilidže. Načelnik Općine Ilidža prof. dr. Senaid Memić se zahvalio predstavnicima Općine Centar, te rekao da su štete uzrokovane majskim poplavama na području općine procijenjene na skoro milion KM. „Značaj ove pomoći je višestruk. Prvo, jer ona dokazuje međusobnu saradnju i

poštovanje. Drugo, jer mi kao općina na svaki problem reagujemo. Treće, da sredstva nisu problem kada su u pitanju ozbiljne situacije i na kraju da ne mislimo samo sami o sebi. Ovaj put Općina Centar je vidjela da imamo probleme i sredstvima koja su nam donirana data nam je mogućnost da ne govorimo kako je problem samo problem onoga kojem se desio, nego svih dobronamjernih”, rekao je načelnik Općine Ilidža prof. dr. Senaid Memić. Protokol je potpisan između Općine Centar i Općine Ilidža na prijedlog Službe civilne zaštite Općine Centar, a načelnik Bećirević je odobrio novčanu pomoć u iznosu od 30.000 KM za otklanjanje šteta na poplavljenim područjima.

Regulacije korita rijeka na području općine Ilidža



Izgradnja regulacije korita rijeke Zujevine na lokalitetu MZ Blažuj, kod firme "Bosanka" u završnoj je fazi. Ovi poslovi povjereni su dvijema firmama. Izvođač radova "A.G Ahydron Građenje" d.o.o Sarajevo privodi radove kraju u dužini 150 metara regulacije korita, širine 12 metara i visine armiranobetonskih zidova tri metra. Ovo je zajednički projekat Općine Ilidža i Ministarstva privrede Kantona Sarajevo, a vrijednost projekta je 390.000 KM od čega je Ministarstvo sufinansiralo 306.000 KM. Izvođač "Mevludin commerce" d.o.o također radi regulaciju korita rijeke Zujevine u dužini od 150 metara. Vrijednost projekta je 370.000 KM, od čega Ministarstvo privrede Kantona sufinansira 300.000 KM. Rješavanjem regulacije ovog korita stvorit će se pretpostavke za realizaciju projekta izgradnje servisne sekundarne saobraćajnice za naselje Vlakovo. Općina Ilidža finansira izgradnju regulacije korita rijeke Dobrinje u MZ Stup II. Firma "Unigradnja" je izvođač radova u dužini od 100 metara, širine korita devet metara i visine armiranobetonskih zidova oko 2,70 metara. Vrijednost projekta je 200.000 KM i ti radovi su završeni. "A.G Ahydron Građenje" je nastavila sa izgradnjom regulacije narednih sto metara na istom lokalitetu u vrijednosti od 190.000.KM. Radovi su u toku, a trebali bi biti okončani za dva mjeseca, što ovisi od vremenskih uvjeta. U toku je javna nabavka za radove čišćenja potoka na području općine Ilidža i po okončanju procedure, koja se očekuje sredinom oktobra, očekuje se potpisivanje ugovora sa izvođačem radova.



Položeno cvijeće na centralno spomenobilježje

U povodu obilježavanja 22. godine od formiranja Prvog korpusa ARBiH, delegacije koordinacije boračkih udruženja, predvođena generalom Fikretom Prevljakom i Općine Ilidža, predvođena načelnikom prof. dr. Senaidom Memićem, posjetile su 1. septembra 2014. godine centralno spomenobilježje šehidima i poginulim borcima sa područja ove općine na kojem su položili cvijeće, te šehidima i poginulim borcima učenjem Fatihe i minutom šutnje odali počast.



Predsjedavajući Predsjedništva BiH Bakir Izetbegović posjetio Općinu Ilidža

Predsjedavajući Predsjedništva Bosne i Hercegovine Bakir Izetbegović posjetio je Općinu Ilidža i prisustvovao druženju privrednika ove općine koje je održano u Multifunkcionalnoj sali Općine. Tom prilikom je prezentovana jedna od najvećih i najznačajnijih investicija, ne samo u općini Ilidža nego i u cijeloj Bosni i Hercegovini, projekat „Nova Ilidža“. Prilikom svog obraćanja ilidžanskim privrednicima Izetbegović je posebno istakao značaj stranih investicija i privlačenje stranog kapitala u našu zemlju, a to možemo samo ako svijetu pošaljemo pozitivnu sliku iz Bosne i Hercegovine. Na organizovanom susretu privrednika Ilidže

sa predsjedavajućim Predsjedništva BiH Bakirom Izetbegovićem i načelnikom Općine Senaidom Memićem, prisustvovao je, između ostalih, i predsjednik OO SDA Ilidža Fikret Prevljak. Načelnik Općine Ilidža prof. dr. Senaid Memić je naglasio u svom obraćanju da su zapošljavanje i privredne investicije prioritet u ovoj Općini. "Dosta naših projekata su infrastrukturni projekti, ali koristimo svaku priliku da posebnu pažnju pridajemo privrednim projektima koji će omogućiti samoodrživi razvoj i prosperitet naše lokalne zajednice. Administracija ne smije biti komplikovana. Ona mora biti servis građana, a posebno privrednika, kako bi

pomogla, a ne otežala vašim projektima", rekao je načelnik Memić. Predsjedavajući Predsjedništva BiH Bakir Izetbegović se osvrnuo na strana ulaganja koja privrednicima itekako mogu olakšati poslovanje. "Strane investitore i prijatelje koji su spremni ulagati u BiH neprijateljski dočekujemo. To ne smije biti tako. Ako nam je Turska odobrila uvoz 150.000 tona mesa, odobrila

kredite, dala milione maraka za pomoć poplavljenim područjima, zašto sumnjamo u njihove namjere? Trebamo iskoristiti tu priliku i pomoći našoj privredi i privrednicima. Treba poslati jasnu poruku - BiH je sigurna zemlja i privući strane investicije. Prioriteti su zapošljavanje, ali prije toga očuvanje cjelovitosti i teritorijalnog integriteta BiH", kazao je, između ostalog, Izetbegović.



Obilježena 22. godišnjica formiranja “Prvog motorizovanog bataljona Hrasnica”

U organizaciji Udruženja “Četvrta viteška motorizovana brigada Ilidža”, Podružnice “1. Motorizovani bataljon Hrasnica”, od 15. do 17. septembra 2014. godine, obilježene su 22 godine od formiranja “Prvog motorizovanog bataljona Hrasnica”. Tokom prva dva dana obilježavanja godišnjice, 15. i 16. septembra, u Sportskom centru Hrasnica, održan je Memorijalni turnir “Šehidima i poginulim borcima 4. Viteške motorizovane brigade”. Na turniru su učestvovala ekipe Prvog bataljona, Četvrtog bataljona, RVI i Ratne bolnice, a pobjedila je ekipa RVI. Drugo mjesto zauzela je ekipa Ratne bolnice, a na trećem mjestu je bila ekipa Četvrtog bataljona. Nakon akšam namaza 16. septembra, u novoj džamiji Hrasnica, pručen je Tevhid šehidima Prvog motorizovanog bataljona, a 17. septembra, na Igmanu je odata počast i održan historijski čas na spomen obilježju komandantu Prvog bataljona, Četvrte viteške motorizovane brigade, Kerimu Džafiću, koji je na ovaj dan 1992. godine izgubio život na ovom području.



Da se ne zaboravi

Udruženje Žrtve opkoljenog grada Sarajeva 1992-1996., uz podršku Općine Ilidža obilježili su 14. septembra 22. godišnjicu odbrane Otesa, Dogloda, Stupa, Azića i Bara. Položeno je cvijeće na spomen-obilježje na platou ispred MZ Otes i odata je počast šehidima i poginulim borcima sa ovog područja. Fadil Hadžić, predsjednik Udruženja, kazao je da se na ovaj način želi prisjetiti krvavih bitki koje su vođene za ova naselja, kao i onih koji su nesebično dali svoje živote u odbrani grada i cijele BiH. „Sa nama su i učesnici ovih bitaka koji su prisutnima ispričali šta se sve dešavalo na ovim područjima. Prisjetili smo se i naših poginulih i svih onih koji su dali ogroman doprinos u odbrani Otesa, Dogloda, Stupa, Azića i Bara. Na nama je da ih pamtimo i nikada ne zaboravimo. Njihove žrtve su ogromne, jer da nije bilo njih, danas se ne bismo sigurno ni okupljali”, rekao je Hadžić. Članovi Udruženja Žrtve opkoljenog grada Sarajeva 1992-1996. posjetili su i ostala spomen obilježja na području općine Ilidža, položili cvijeće i odali počast poginulim borcima i šehidima.

Obilježena 22. godišnjica odbrane Otesa, Dogloda, Stupa, Azića i Bara

U prisustvu saboraca, članova porodica, prijatelja, sugrađana, učenika, te predstavnika Općine Ilidža i boračkih udruženja, a u organizaciji Udruženja organizatora otpora veterana rata, dobrovoljaca, prvoboraca i branilaca „Zelene beretke” i Općine Ilidža, 12. septembra 2014. godine obilježena je 22. godišnjica odbrane Otesa, Dogloda, Stupa, Azića i Bara, položeno je i cvijeće ispred spomen-obilježja na platou ispred mjesne zajednice Otes, gdje je održana i centralna manifestacija. Cvijeće je položeno i ispred spomen-obilježja na Stupu II, Stupskom Brdu i Pejtonu. Prisutni su se prisjetili tih teških, ali i herojskih ratnih dana kada se vodila jedna od najtežih bitaka za odbranu ovih, izuzetno strateški važnih prostora. Prigodan kulturno-umjetnički program priredili su učenici Treće osnovne škole i Osnovne škole El-Manar.





Završena rekonstrukcija četiri ulice

Na području mjesnih zajednica Stup, Otes i Hrasnica I završena je rekonstrukcija četiri ulice. Okončani su radovi u ulicama Trešnje (MZ Stup), u dužini od 190 metara i širini četiri metra i Oteška (MZ Otes), u dužini 140 i širini 3,5 metara, izvođača firme „Orman“ d.o.o. Radovi su završeni sa ukupnom vrijednošću od 29.500 KM, a investitor je Općina Ilidža i građani. U Mjesnoj zajednici Hrasnica I završena je rekonstrukcija ulice 6. april u dužini od 240 i širini šest metara. Vrijednost radova u ovoj ulici iznosila je 70.000 KM, izvođač radova je „Sarajevoputevi“ d.d., a investitor Općina Ilidža. Radovi u vrijednosti od 20.000 KM su završeni i na asfaltiranju platoa u ulici Hifzi Bjelavca (MZ Stup). Površina platoa čiji je izvođač radova „Unigradnja“ d.d. iznosi 350 metara kvadratnih, a Općina Ilidža kao investitor izdvojila je 20.000 KM. Pored završene rekonstrukcija ulica u toku su radovi i u ulici Ismeta

Alajbegovića Šerbe u MZ Stup. Predviđena rekonstrukcija ulice je u dužini od 350, a širini četiri metra. Investitor Općina Ilidža izdvojiti će oko 60.000 KM, a izvođač radova je „Sarajevoputevi“ d.d.

Okončana treća faza saobraćajnice uz Željeznicu



Novi asfalt u Mlinskoj ulici



Asfaltiranje Mlinske ulice u Butmiru završeno je 30. septembra 2014. godine. Asfaltiranje ulice dužine 120 i širine šest metara investirala je Općina Ilidža, a ukupna vrijednost iznosi 50.000 KM. Izvođač radova je firma "MGBH" d.o.o.

Treća faza saobraćajnice u naselju Sokolović-Kolonija, od mosta Alije Izetbegović do ratnog mosta, uz rijeku Željeznicu je okončana. Ovom fazom urađeno je 220 metara dužine asfalta. Izvođač za građevinske radove je TB Inžinjer d.o.o., a za montažu javne rasvjete bila je zadužena firma Testingelektro d.o.o. Vrijednost investicije je 221.395,05 KM, a za javnu rasvjetu 36.828,79 KM. Radove je finansirala Općina Ilidža, dok je nadzor nad ovim radovima imao Zavod za izgradnju Kantona Sarajevo. U ovoj godini trebala bi početi i četvrta faza koja je već ugovorena sa firmom "Mevludin Commmerc" d.o.o. Trebalo bi se raditi još 236 metara, a vrijednost ove faze bi bila 279.000 KM, a za javnu rasvjetu 38.000 KM.

Edukacija za članove općinskih izbornih komisija

Centralna izborna komisija Bosne i Hercegovine je u skladu sa planom i programom edukacije organa za provođenje izbora 2014. godine organizovala edukaciju za članove općinskih izbornih komisija na temu „Rad biračkih odbora na dan izbora“. Edukacija je održana 11. i 12. septembra 2014. godine u Multimedijalnoj sali Općine Ilidža. Na edukaciji su učestvovali članovi iz 29 opštinskih komisija sa područja Bosne i Hercegovine, a predavači su bili članovi Centralne izborne komisije Bosne i Hercegovine. Učesnike je pozdravio načelnik Općine Ilidža prof. dr. Senaid Memić i zaželio im sretan i uspješan rad. Kao gosti posmatrači edukacije su prisustvovali i predstavnici OSCE-a, OHR-a i nevladine organizacije „Pod Lupom“.



Mnoge poznate osobe na Kafi sa..

Institut za razvoj mladih KULT u susret predstojećim izborima organizirao je tematska druženja predstavnica i predstavnika vlasti i mladih, u sklopu ciklusa "Političko razbuđivanje uz kafu sa..." Gost prve kafe sa... održane 1. septembra u Obrazovno rasonodnom centru za



mlade SPAJALICA bio je Elmedin Dino Konaković zastupnik u Skupštini Kantona Sarajevo, član Komiteta za sport pri Vijeću Evrope te dugogodišnji kapiten i igrač Košarkaškog kluba Bosna. „Ja sam u politiku bukvalno uskočio iz sporta u kojem si uglavnom prilično omiljen, jer nema mnogo ljudi koji ne vole sport. Nakon toga se počnete baviti politikom, obučete dres jedne političke partije i počnete komunicirati sa određenim brojem ljudi koji vas drugačije posmatraju. Zbog toga je jako teško da se mladi ljudi uopšte odluče za bavljenje politikom. Nekoliko sjajnih mladih ljudi je doslovno pobjeglo sa scene glavom bez obzira jer su naišli na zidove koji se ne mogu rušiti. Neki mladi ljudi su eliminisani tako što ih sada nema na listama a obećavaju im se neke izvršne funkcije koje neće dobiti. Zbog toga će se mislim na ovim izborima stvoriti jedan front koji do sada nije postojao jer će se aktivnije angažirati ljudi koji su smijem to reći u zavjetrini i nisu ljubimci svojih političkih šefova. To će biti presudno u odabiru kadrova jer će ljudi s kapacitetom zaista doći do odgovornih i izvršnih funkcija“, istakao je Elmedin Dino Konaković.

Aktivnosti OIK-a Ilidža

Predstavnici OIK-a Ilidža održali su sastanak sa sekretarima MZ, u Općini Ilidža 9. septembra 2014. godine kako bi dogovorili na koji način će obilaziti sve osobe koje glasaju putem mobilnog tima. Da bi se omogućilo glasanje putem mobilnog tima neophodno je bilo kontaktirati sekretare mjesnih zajednica, kako bi se izvršilo evidentiranje i dolazak mobilnog tima na lice mjesta radi potpisivanja izjave o saglasnosti za ovakav vid glasanja.





U Općini Ilidža ovjereneno 25.708 fotokopija i 3.480 potpisa

Služba za opću upravu Općine Ilidža u julu i augustu imala je enormno povećanje obima posla u svim oblastima rada. Povećanje se naročito odnosi na matični ured kao i na ovjeru potpisa, rukopisa, prepisa i na poslovima sklapanja braka, potvrdila nam je pomoćnica načelnika za opću upravu Mirsada Hasečić. "Obzirom da je u funkciju stavljen jedinstveni matični registar i da se svi izvodi izdaju i za druge općine Federacije BiH, u matičnom uredu Općine Ilidža samo u augustu izdato je 2.882 izvoda iz matičnih knjiga", rekla je Hasečić. U Službi je u augustu također povećan broj provjera u procesu izdavanja ličnih karata i biometrijskih pasoša. Ukupno je provjereno 2.381 upis za lične karte i 768 upis za provjeru biometrijskih pasoša. Na


poslovima ovjere potpisa, prepisa i rukopisa ovjereneno je 25.708 fotokopija i dokumenata i 3.480 potpisa. "Zbog revizija prava iz oblasti socijalne zaštite, upisa u škole i prijave na konkurse došlo je do povećanja broja ovjere potpisa, rukopisa i prepisa", smatra pomoćnica Hasečić. Pred matičarem Općine Ilidža u augustu je zaključeno 86 brakova, a također je povećan i broj zahtjeva za ispravku i dopune podataka u matičnim knjigama. Iz Općine Ilidža otpremljeno je putem pošte 2.330 akata, a putem kurira 1.416 akata. Na osnovu provedene ankete kroz Centar za pružanje usluga građanima dnevno prođe 1.600 stranaka. Također, Centar za birački spisak imao je veći obim aktivnosti i priprema pred predstojeće izbore.

Izrada Strategije razvoja Općine Ilidža 2014. – 2020.

Izrada strategije razvoja Općine Ilidža 2014. – 2020. bila je tema sastanka koji je održan 04. septembra 2014. godine u Općini Ilidža. Rukovodioci službi ovog organa analizirali su, ocijenili stanje i iznijeli svoje mišljenje, sugestije i prijedloge kako bi Strategija bila što efikasnija i provodljivija. U razgovoru su definisani ekonomski, društveni i okolinski aspekt razvoja Općine Ilidža i predloženo je nekoliko vizija koje će biti dostavljene Zavodu za planiranje Kantona Sarajevo, koji je

zadužen za izradu Strategije razvoja Kantona Sarajevo. Zbog povoljnog geografskog položaja, klimatskih uslova, obilja vode, plodnosti zemljišta i šumskih bogatstava Ilidža je od predhistorijskih dana bila pogodan prostor za život. Njeni resursi određuju njenu prepoznatljivu izražajnost, što se nastoji potencirati i ovom Strategijom, kako je Ilidža jedna od najmodernijih i najnaprednijih lokalnih zajednica u Bosni i Hercegovini.





Najljepša fotografija „Tragovi jeseni“ Ivane Mihajlović

Vijeće mladih općine Ilidža realizovalo je projekat "Foto-natječaj - Ljepša strana Ilidže". Komisija za izbor najbolje fotografije pristigle na konkurs 10. septembra 2014. godine odabrala je najljepše. Sve fotografije bile su postavljene na društvenoj mreži Facebook i broj like-ova je takođe uticao na odabir. Prvo mjesto pripalo je Ivani Mihajlović "Tragovi jeseni", drugo mjesto su podijelili Anel Bajramović "Rimski most-usamljena gromada" i Tarik Bičo "Ramazanska noć". Treće mjesto su podijelili Elvedina Agčić "Vrelo Bosne" i Nejra Džananović "Pod sretnim nebom". Sve fotografije mogle su se pogledati na izložbi, 13. septembra u Obrazovnom centru Spajalica. Fotografije pristigle na ovaj konkurs koristit će se za razglednice općine Ilidža, a mladi takmičari su novčano nagrađeni. Prvo mjesto 70 KM, drugo po 50 KM, i treće po 30 KM.

Na Ilidži humanitarni bazar „Kermes“

Udruženje građana „Semerkand“ organizovalo je bazar „Kermes“ na obali rijeke Željeznice, pored pješačkog mosta na Ilidži gdje se može pronaći muška, ženska i dječija garderoba. Sav prihod bazara izdvaja se za izgradnju studentskog centra u ulici Butmirska cesta bb Ilidža. Većina sredstava su donirana i sve se zasniva na principu dobrotvornog rada. Mirza Beganović je član Udruženja „Semerkand“ koji prati rad i funkcionisanje sajma i kazao nam je da su zadovoljni posjetom te se nada da će ih vremenske prilike poslužiti u narednih deset dana koliko će sajam trajati. „Pozivamo građane Ilidže i Sarajeva da nas posjete, odaberu nešto za sebe i time doprinesu izgradnji studentskog centra“, kazao nam je Beganović.



Pronađeni novac vraćen vlasniku

Da još uvijek postoje dobri i poštteni ljudi pokazuje primjer događaja u Općini Ilidža. Mirsad Sarajkić, uposlenik Općine Ilidža je 22. septembra 2014. godine, pronašao i vratio određenu svotu novca vlasniku Kadriji Tahmazu iz Blažuja. „Zahvaljujem se službeniku Mirsadu Sarajkiću koji je pronašao novac koji sam izgubio i pošteno ga vratio. Ovakvi primjeri vraćaju vjeru u ljude i nadam se da će njegov primjer slijediti svi



koji pronađu tuđu svojinu“, kazao nam je Tahmaz. Mirsadu Sarajkiću ovo nije prvi put da pronalazi novac ali i vlasnike jer kako reče, „tuđe nikome ništa dobro neće donijeti“.



Stoljetni drvored u srcu Ilidže

Aleja na Ilidži predstavlja najljepši drvored u Bosni i Hercegovini koji je zasađen stablima kestena i platana u dužini od 3,5 kilometra. Aleju sačinjava 726 stabala javorolisnog platana, sađenih u dva reda 1892. godine, te desetine stabala divljeg kestena koji su sađeni 1888. godine. Ovaj „zeleni tunel“ oduvijek je predstavljao pravu turističku atrakciju. Dio Velike aleje svakako su i fijakeri koji više od 120 godina putnike prevoze Velikom alejom do Vrela Bosne. Prvi fijaker je Velikom alejom povezo putnike davne 1895. godine, a danas su 30 fijakera koji voze duž aleje postali Ilidžanska tradicija. Posjetili smo fijakeriste i zatekli lijep prizor u Velikoj aleji potpomognut sunčanim vremenom i brojnim turistima koji su bili prisutni čak i radnim danom. U

razgovoru sa fijakeristima koji su se smjenjivali, zetekli smo i turistkinju koja je jednog od fijakerista pitala da li vozi do Vrela Bosne, na šta je on šaljivo odgovorio: „Ja upravljam, a konj vozi“. Svoju priču sa nama je podijelio i čovjek koji je treća generacija fijakerista u svojoj porodici.

120 godina tradicije

O dugogodišnjoj tradiciji ovog posla i njenoj održivosti do današnjeg vremena svjedoče i brojni fijakeristi čiji posao prelazi sa koljena na koljeno. Naš sagovornik i dugogodišnji fijakerista Emin Mahmutović ispričao nam je svoju porodičnu priču koja je više od 120 godina vezana za fijakere. „Počeo sam raditi sa svojim ocem koji je posao naslijedio od svog oca, mog dede, kada je bilo samo pet fijakera...“, započeo je priču Mahmutović. Porodica Mahmutović je imala kovačku radnju u Butmiru i jedna je od prvih koja je počela da radi sa fijakerima. Tokom dugogodišnjeg rada Ilidžu i Veliku aleju posjećivale su brojne poznate ličnosti, glumci i pjevači, koje su fijakeristi vozili alejom do Vrela Bosne i nazad. Prvi fijakeri nastali su u fabrikama u Beču i drugim gradovima i vrlo brzo su se pojavili na putevima u Sarajevu. Danas su



fijakeristi uglavnom ti koji održavaju fijakere poput porodice Mahmutović koja posjeduje kovačku radnju, pravi, popravlja i održava fijakere. „Pet ili šest fijakera koji trenutno voze je izašlo iz naše kovačke radnje. Ljubav prema ovom poslu prenio sam i na sina koji vozi fijaker, a počeo je i sa pravljenjem dijelova“, dodao je Mahmutović. Pored same vožnje fijakerima, postojala je i tradicija odlaska mnoštva mladih i starih stanovnika Ilidže na teferiče zaprežnim kolima, biciklima, ali posebnu čar predstavljao je odlazak na teferiče sa fijakerima. Danas je ova tradicija potpuno ovisna od pomoći države i lokalne zajednice. Vrlo je važno da

shvatimo važnost i turistički potencijal ovog tradicionalnog posla. „Većina ljudi misli da ovdje ima dosta novca, međutim, ljudi koji su se odlučili baviti ovim poslom, rade to uglavnom iz ljubavi. Dva ili tri mjeseca sezone koje mi radimo, nažalost ne može nadomjestiti troškove koje imamo tokom cijele godine, a koji se odnose na održavanje fijakera i konja“, na kraju je dodao Mahmutović, jedan od fijakerista sa najdužim stažom. Nesumljivo je da ova tradicija privlači veliki broj turista i dopunjava ukupnu turističku ponudu Sarajeva. Jedna je od unikatnih aktivnosti koju sa ponosom trebamo održavati, shvatiti njen značaj i djelovati na njenom poboljšanju.



Razmjena iskustava mladih volontera Crvenog križa

Crveni križ Općine Ilidža bio je organizator seminara za mlade volontere na Ilidži koji se održavao od 11.-15. septembra u prostorijama Instituta za mlade Kult. Seminar „Razmjena iskustava mladih volontera Crvenog križa sa djelovanja u poplavama“ okupio je mlade aktiviste CK Ilidže i Beograda koji su razmijenili iskustva i naučili kako se ponašati u kriznim situacijama. Neke od tema koje su se obrađivale na ovom seminaru su organizacija evakuacije i prihvatilišta, psihološka pomoć u katastrofama, pokazna vježba-simulacija nesreće zemljotres, prikupljanje, organizacija i distribucija humanitarne pomoći. Gošća iz Beograda Jelica Erceg kazala nam je da su na Ilidži dočekani srdačno i da se nada da će ovo biti dobro

iskustvo. „Imamo dugogodišnju saradnju sa CK Ilidža. Nakon poplava koje su nas zadesile, ovo je bila idealna prilika da razmijenimo iskustva“, kazala je Jelica Erceg, volonterka CK Palilula iz Beograda. Predsjednik mladih CK Ilidža Jasmin Nikšić održao je prezentaciju o stanju poplava koje su zadesile BiH i Srbiju. „Cilj seminara je razmjena iskustava volontera koji su direktno učestvovali i dali svoj doprinos u toku poplava koje su nas zadesile. Gosti iz Srbije su bili fokusirani na evakuaciju stanovništva a mi na raspodjelu humanitarne pomoći. Ovaj seminar nas je spojio da učvrstimo i prenesemo znanje i iskustva jedni drugima“, kazao je Nikšić. Osim redovnih aktivnosti, za goste iz Beograda bio je organizovan i obilazak Ilidže i Sarajeva.

Poklon paketići za prvačice

Prvi dan nove školske 2014/2015. godine, koja je počela 1. septembra protekao je u znaku dobrodošlice prvačicama, a obilježen je svečanim prijemom u svim ilidžanskim osnovnim školama, gdje su učenici starijih razreda priredili prigodan program. U 11 osnovnih škola na području općine Ilidža u dva upisna roka u prvi razred upisano je ukupno 676 đaka. I ove godine, tim povodom, Općina Ilidža je darovala poklon-paketiće svim prvačicama, u kojima se nalazi pernica sa školskim priborom i sveska.





Jedinstvena ponuda na Ilidži – prvi adrenalin park u BiH

Prvi adrenalin park u BiH, koji se prostire na četiri dunuma, smješten je na teritoriji općine Ilidža u MZ Osjek u ulici Hendekuša 131. Samo mjesto i okoliš stvoreni su za rekreaciju i opuštanje. Prirodni ambijent je faktor za fizičko i mentalno opuštanje, a adrenalin koji ćete ovdje sigurno osjetiti djeluje kao doživljaj koji omogućava pomicanje ličnih granica, oslobađanje od stresa, izbacivanje negativne energije i aktivni odmor za sve koji vole izazove. Adrenalin park namijenjen je svima i zamišljen je kao izletišta za različite dobne skupine od sedam do 77 godina. Kako kažu njihov cilj jeste odvojiti mlade od računara i imaginarnog okruženja, gdje nažalost većinom i provode svoje vrijeme i podstaći ih da komuniciraju jedni sa drugima, da timski prelaze prepreke i da grade odnos povjerenja sa drugima. Adrenalin park sadržaj se sastoji od više poligona. Tu su adrenalin park, paintball, zip line, odbojka na pijesku, ljudski stolni fudbal i dječiji park. Šumske prepreke, kao jedne od najatraktivnijih ponuda ovog parka, nalaze se na visini od osam metara i ima ih ukupno 22. To je poligon koji se sastoji od više vježbi (elemenata) preuzetih iz alpinizma. Poligon je smješten na rastegnute sajlama između drveća, na visini iznad tri metra. Prepreke koje su prilagođene i djeci i odraslima ljude

oslobađaju straha od visine, na njima stiču sposobnost timskog rada, ukratko doživljaju osjećaj koji povećava samopouzdanje pojedinca, povećava njihovu izdržljivost, fizičku kondiciju, duh grupe i motiviranosti, razvoj sposobnosti vođe, a na kraju omogućuje djeci i odraslima doživljaj pustolovine. „Sudionici su osigurani potrebnom sigurnosnom opremom (pojas i kaciga) i prikopčani vezom za sigurnosnu sajlju koja se nalazi iznad svih vježbi. Cilj ovih vježbi je savladavanje straha, razvoj motorike i koncentracije, vrlo je zabavno i potpuno sigurno. Donja granica je 14 godina, a gornja granica ovisi samo o vama. Na raspolaganju našim posjetiocima je i stručni vodič, a za svaku aktivnost, podcrtavam, učesnik dobija posebnu sigurnosnu opremu prema evropskim standardima“, kazao nam je Nedim Dizdar, direktor ovog parka. Još jedna od ponuda ovog parka jeste i paintball, koji posjetiocima pruža nezaboravan doživljaj. Na ovom prostoru djeluje i Adrenalin paintball klub koji je jedini u BiH i državni predstavnik na većini turnira u Evropi. Ulaz u park je slobodan, a na raspolaganju svim posjetiocima su dva restorana koji nude tradicionalnu bosansku kuhinju. Svaka zabava se pojedinačno naplaćuje, a cijene su pristupačne. Posjetitelji su prepoznali jedinstvenost adrenalin parka, dolaze individualno i grupno, pa tako su škole, koledži, firme kao i ljudi iz javnog, političkog i kulturnog života njihovi redovni gosti.



U azilu za pse u Gladnom polju 210 pasa

Općina Ilidža je jedina u Kantonu Sarajevo koja ima prihvatilište za pse. Prihvatilište u Rakovici predstavlja centar u koji se smještaju izgubljeni i napušteni psi sa područja općine Ilidža. Azil egzistira u okviru Zemljoradničke zadruge Ilidža u Gladnom polju. Azil nema dovoljno sredstava kako bi se podmirile sve potrebe pasa, ali se trude da stvore uslove kako bi psi koji su tu imali normalne uslove boravka. To nam je potvrdio direktor ZZ Almir Džanković. Ovo prihvatilište opstaje samo zahvaljujući finansijskoj pomoći Općine



Ilidža i nesebičnom angažmanu načelnika Općine Ilidža, prof. dr. Senaida Memića. „U prihvatilištu je trenutno oko 210 pasa, a njihov broj svakodnevno raste iako je kapacitet 140 pasa. Mi se trudimo da stvorimo dobre uslove jer su uvijek prisutne osobe koje brinu o njihovoj ishrani, higijeni i zdravlju. Radi se i na socijalizaciji svih pasa koji tu borave“, kazao nam je Džanković. „Gorući problem trenutno je nevođenje evidencije o vlasničkim psima koji nakon nekog vremena bivaju ostavljeni na ulicama. Najveći broj pasa u prihvatilištu je kastriran i sterilisan“, rekao je Džanković. Svi psi koji se tamo nalaze su već druželjubivi i spremni za igru i udomljavanje. Otvoreno je za javnost te su dobrodošli svi ljudi koji žele da se druže sa psima i prošetaju ih te na taj način pomognu njihovoj socijalizaciji i udomljavanju. Direktor Zemljoradničke zadruge Almir Džanković istakao je zahvalnost Općini Ilidža i načelniku Memiću na izdavanju oko 50.000 KM sredstava godišnje zbog kojih se bar djelimično smanjuju brige građana od ugriza napuštenih pasa.




Projekat „Ceker za kesu“ postaje tradicija na Ilidži

Ekološko udruženje „Aleja“ je 6. septembra 2014. godine na Ilidži u Maloj Aleji realizovalo projekat pod sloganom „Ceker za kesu“, koji je već postao tradicija. Aktivisti udruženja podijelili su građanima općine Ilidža 100 platnenih cekera i letke sa porukama o zaštiti ekosistema. Cilj projekta je zaštita i očuvanje ekosistema, buđenje svijesti građana o važnosti izbacivanja iz upotrebe plastičnih kesa.



Predstavljamo: KUD „Ekrem Mujkić“

Amaterski rad kulturno umjetničkog karaktera Udruženja KUD "Ekrem Mujkić" počinje još 1951. godine kada se odmah nakon Drugog svjetskog rata, u periodu obnove mjesta, ukazala potreba za kulturnim radom i sadržajima koji bi okupljali omladinu. Rad pojedinih spontanih družina sklonih muzici i igri, rezultirao je da se, pedesetih godina, osnuje kulturno - umjetničko društvo, koje bi organizovano okupljalo mlade ljude i radilo na kulturnom uzdizanju i očuvanju tradicije naroda BiH. Osnivači: Safet Efendić, Halid Čenanović, Mujo Suljić, Meho Lingo, Salko Tufo, i drugi, donose odluku da se održi osnivačka skupština i osnuje KUD kome daju ime "Bratstvo i jedinstvo". U jednoj od ključnih bitaka 17. marta 1993.godine, kako za naselja općine Ilidža, tako i za grad Sarajevo, u Donjem Kotorcu gine nekadašnji član ovog društva Ekrem Mujkić. Od tada Udruženje sa ponosom do današnjih dana nosi njegovo ime. Društvo se sastoji od više sekcija, koje rade na području općine Ilidža: folklorna sekcija A, B i C, ansambl, dramska sekcija A i B grupa, orkestar, veteranska sekcija i plesna sekcija A i B grupa. U Bosni i Hercegovini Udruženje je gostovalo na svim



značajnijim festivalima i kulturnim manifestacijama koje za cilj imaju očuvanje kulturne baštine i tradicije naših naroda. Udruženje je osim Internacionalnog festivala folklor Sarajevo i Bašćaršijskih noći uzimalo učesce na festivalima u Mostaru, Blagaju, Konjicu, Jablanici, Gradačcu, Maglaju, Žepču, Bugojnu, Goraždu. Što se tiče putovanja van zemlje Društvo je putovalo u Francusku, Tursku, Sjeverni Kipar, Crnu Goru, Makedoniju, Češku, Italiju i Hrvatsku. „Posljednja turneja ove godine je bila 29. augusta 2014. godine u Hrvatskoj-Varaždin na Festivalu „Folklofonija 2014“. Naše društvo je učestvovalo sa tri koreografije: Gradske igre, Igre iz Srednje Bosne i Kraljeva Sutjeska. Društvo i igrači koji su nastupali su oduševljeni samim programom, gostoprimstvom i svim onim što je turneju činilo lijepom i jedinstvenom. Vraždinci su ljudi sa posebnim duhom, nastrojeni prijateljski i domaćinski. Zbog takvih okolnosti naše društvo je uživalo na Festivalu. KUD „Ekrem Mujkić“ je putovalo u julu 2014.godine na Turneju u Italiji - Cingoli. Utisci igrača i članova Društva su i više nego pozitivni. Festival u Cingoli je bio veoma organizovan s obzirom da je prvi festival. Domaćini su bili veoma gostoprimljivi, a predstavili smo se sa tri koreografije: Kraljeva Sutjeska, Lindo i Gradske igre“, rekao nam je Vedad Polovina menadžer društva.



Team uz finansijsku podršku Općine Ilidža. Iako trka nije imala takmičarski karakter organizator je obezbijedio simbolične nagrade za pobjednike i ručak za sve učesnike. Na cilj je od najmlađih učesnika, prvi je stigao Salih Hasanbegović, a od najstarijih Nahid Hasanbegović. Također, nagrađeno je i prvih pet žena: Sabina Veispahić, Ivana Mihajlović, Sanja Gladanac, Svjetlana Cerovina i Naida Džekić, a najbržim parom proglašeni su Vjekoslav Brkić i Edita Salković.

Na „Tour de Igman 2014“ učestvovao veliki broj biciklista

U Velikoj aleji na Ilidži, 21. septembra 2014. godine na startu druge po redu biciklističke rekreativne ture „Tour de Igman 2014“ okupilo se više od stotinu učesnika i zaljubljenika u prirodu. Prije početka trke biciklisti su položili cvijeće na spomen-kosturnicu u Velikom parku na Ilidži i odali počast svim poginulim u Drugom svjetskom ratu i proteklom odbrambeno-oslobodilačkom ratu

u Bosni i Hercegovini. Učesnike trke pozdravio je načelnik Općine Ilidža prof. dr. Senaid Memić i poželio im ugodnu vožnju i dobru zabavu nakon čega su krenuli utvrđenom stazom preko Jasika, Stojčevca, Kovača, Osmica, Šajine kuhinje, Lasičke strane, ratne džamije do cilja na Velikom polju na Igmanu. Organizator trke je Klub za sportski razvoj i rekreaciju „Partizan“- TREK



Sedmi tradicionalni turnir „Djeca Butmira“

Na stadionu Fudbalskog kluba „Butmir“, 06. i 07. septembra 2014. godine održan je sedmi tradicionalni turnir „Djeca Butmira 2014.“ Poslije dvodnevnog igranja po grupama, prvo mjesto je osvojila Škola fudbala „Sašk Napredak“, drugo mjesto „Butmir“, treće mjesto „Mladost“ i četvrto mjesto Škola fudbala „Rudar“. Sve ekipe su dobile pehare i diplome za osvojena mjesta, dok je Fer-play pehar osvojila Škola fudbala „Vitez“. Najbolji igrač turnira bio je Nermin Bjelonja iz Škole fudbala „Sašk Napredak“, najbolji golman Kenan Čenanović iz Škole fudbala „Butmir“, a najbolji strijelac bio je Arman Adilović iz Škole fudbala „Sašk Napredak“. Organizator turnira je bila Škola fudbala „Butmir“, a Općina Ilidža je bila pokrovitelj turnira.



Prezentovana www.shishaj.se

U Institutu za razvoj mladih KULT na Ilidži organiziran je WarmUP događaj na kojem je prezentovana platforma indeksa integriteta institucija www.shishaj.se. Prema informacijama koje se mogu pronaći na platformi koju je izradio Institut za razvoj mladih KULT, su podaci o tome da svaka treća općina u BiH nema službenika koji brine o mladima, zatim da je od ukupno 142 općine u BiH samo njih 69 dostavilo informacije za 2012., a 73 za 2013. godinu u vezi s monitoringom politike prema mladima. „Ovo je prvi put da se podaci prezentuju na ovakav način. Postoje dvije kategorije pod kojima se ti podaci mogu pretraživati, a to su revizorski izvještaji i politika prema mladima”, pojasnila je korištenje platforme indeksa Belma Gijo iz Instituta za razvoj mladih KULT, ističući pohvale Općini Ilidža. Kako bi ljudima bilo jasnije, urađen je i revizorski izvještaj za period od 10 godina koji je obuhvatio institucije na državnom i entitetskom nivou te se radi o cjelokupnoj bosanskohercegovačkoj priči. Sama činjenica da je najveći indeks integriteta stranaka kada je politika prema mladima u pitanju 33,7 od 100 % govori samo za sebe, dok većina stranaka u BiH ima jako mali broj usvojenih strategija politike prema mladima. „Politika prema mladima i revizorski izvještaji uticat će na opći integritet institucija. Korisnici platforme moći će birati da li da prate neku instituciju kroz jednu ili drugu kategoriju, te će na kraju imati rezultate kakav indeks integriteta ima neka institucija ili politička stranka”, kazala je Gijo.

Na Ilidži organizovan izbor za Miss, najljepša Isidora Borovčanin



U kongresnoj sali Hotela Terme na Ilidži 21. septembra održana 19. po redu ceremonija izbora Miss BiH za Miss svijeta. Od 26 učesnica, u selekciju je prošlo 13 djevojaka koje su se borile za titulu Miss BiH. Direktno prenos izbora za Miss BiH za Miss svijeta gledatelji su mogli pratiti uživo na programu Federalne televizije i RTRS-a, kao i glasati na brojeve telefona za djevojke koje su željeli gledati u finalu. Događaj je nazvan "spektaklom mladosti i ljepote", a ove se godine održavao pod motom "ljepota sa svrhom". Za pobjednicu je glasao osmočlani žiri, kao i publika, a Zlatko Zubak, vlasnik licence za Miss BiH za Miss svijeta lente je dodijelio drugoj pratilji Miss BiH, Belmi Ibrahimović (20) iz Srebrenika, prvoj pratilji, Antoniji Vučić (18) iz Kiseljaka, dok je titulu Miss BiH za Miss svijeta ponijela Isidora Borovčanin (18) sa Pala. Općina Ilidža finansijski je podržala ovaj projekt.



Edin Sinanović osvojio bronzu na Svjetskom juniorskom prvenstvu

Edin Sinanović, član Kick-boxing akademije Ilidža i juniorski reprezentativac BiH na Svjetskom juniorskom prvenstvu održanom od 6 -14. septembra u Riminiju-Itaija osvojio je bronzanu medalju. Nakon osvojene srebrne medalje na Evropskom kupu i srebrne na Balkanskom prvenstvu Edin Sinanović je ovu godinu zaokružio osvajanjem bronzane medalje na Svjetskom prvenstvu i time nastavio u kontinuitetu osvajati medalje na velikim takmičenjima. „Ovaj rezultat bit će mi podstrek da nastavim dalje i da se dokazujem i budem još bolji kako bi svojoj zemlji donio i zlato“, rekao nam je Sinanović.